

四庫全書

史部

欽定四庫全書

史部

欽定續通志卷五十八

主事 臣 尹壯圖覆勘

總校官原任侍講臣王燕緒

欽定四庫全書

欽定續通志卷五十七

元紀一

太祖

太宗

定宗

憲宗

太祖皇帝諱特穆津姓却特氏蒙古部人其先世有曰
托本默爾根妻白阿倫果斡生二子長曰布固哈塔吉
次曰博克多薩勒濟固既曰托本默爾根死阿倫果斡
寡居夜寢帳中夢白光自天窻中入化為金色神人阿

倫果幹驚覺遂有娠產一子曰勃端察爾勃端察爾狀貌奇異沈默寡言家人謂之癡獨阿倫果幹語人曰此兒非癡後世子孫必有大貴者阿倫果幹歿諸兄分貲財不及勃端察爾勃端察爾曰貧賤富貴命也貲財何足道獨乘青白馬獵禽兔以食至巴爾圖敖拉之地居焉居數月有民數十家自騰格哩呼喇之野逐水草來遷勃端察爾結茅與之居出入相資一日仲兄忽思之曰勃端察爾獨出而無齋得無凍餒乎即走訪得之邀

與俱歸勃端察爾中路謂其兄曰騰格哩呼喇之民無所屬附若臨之以兵可服也兄以為然至家即選壯士令勃端察爾帥之前行果盡降之勃端察爾歿子巴噶哩台哈必齊嗣生子曰瑪哈多丹瑪哈多丹妻曰摩納倫生七子而寡摩納倫性剛急時雅賚爾部有羣小兒掘田間草根以為食摩納倫乘車出適見之怒曰此田乃我子馳馬之所羣兒輒敢壞之耶驅車徑過之輾傷諸兒有至死者雅賚爾忿怨盡驅摩納倫馬羣以去摩

納倫諸子聞之不及被甲往追之為所敗六子皆死雅
賚爾乘勝殺摩納倫滅其家惟一孫海都尚幼海都者
摩納倫長孫也乳母匿諸積木中得免先是摩納倫第七
子納沁於巴喇呼民家為贅壻聞其家被禍奔視之見
病嫗十數與海都尚在適有兄所乘黃馬掣套竿逸歸
納沁乘之乃偽為牧馬者詣雅賚爾路逢父子二騎先
後行臂鷹而獵納沁識其鷹曰此吾兄所擊鷹也趨前
以計給之轉一河隈遂刺殺之繫馬與鷹趨迎後騎給

之如初復乘隙刺殺之前行至一山下有馬數百牧者
童子數人方擊髀石為戲納沁熟視之亦兄家物也盡
殺童子驅馬臂鷹而還取海都并病嫗歸巴喇呼之地
止馬海都稍長納沁率巴喇呼齊格諸民共立為君以
兵攻雅賚爾臣屬之形勢寢大列營帳於巴喇噶沁河
上跨河為梁以便往來由是四傍部族歸之者漸衆海
都歿子拜星呼爾嗣拜星呼爾歿子敦巴噶嗣敦巴噶
歿子噶布勒汗嗣噶布勒汗歿子巴爾達木嗣巴爾達

木歿子伊蘇克依嗣并吞諸部落勢愈盛大伊蘇克依崩至元三年十月追謚烈祖神元皇帝是為元之始祖初烈祖征塔塔爾部獲其部長特穆津宣懿太后諤楞適生帝手握凝血如赤石烈祖異之因以所獲特穆津名之志武功也族人秦楚特部舊與烈祖相善後生嫌隙絕不與通及烈祖崩帝方幼沖部衆多歸秦楚特近侍有托端呼爾察者亦將叛帝自泣留之托端呼爾察竟帥衆馳去宣懿太后怒其弱已也麾旗將兵身自追

叛者驅其大半而還時帝麾下綽奇別居薩里河而札木哈克部人托台奇爾者居伊嚕格勒泉時欲相侵凌掠薩里河牧馬以去綽奇麾下左右匿羣馬中射殺托台奇爾札木哈克以為怨遂與泰楚特諸部合謀以衆三萬來戰帝時駐軍都爾本兆蘇之野聞變大集諸部兵分十有三翼以俟已而札木哈克至帝與大戰破走之當是時諸部之中惟泰楚特最强其族昭壘部與帝所居相近帝常出獵偶與昭壘獵騎相屬邀與同宿凡其

留者悉飲食之明日再合圍帝使左右驅獸向昭壘昭壘得多獲以歸其衆感之私相語曰秦楚特與我雖兄弟常攘我車馬奪我飲食有人君之度者其惟特穆津太子乎昭壘之長裕勒時為秦楚特所虐不能堪遂與塔海達魯領所部來歸請殺秦楚特以自效帝曰我方熟寐幸汝覺我已而二人復叛去塔海達魯至中路為秦楚特部人所殺昭壘部遂亡時帝功德日盛秦楚特諸部多苦其主非法見帝寬仁時賜人以裘馬心悅之

遂稍稍來降會塔塔爾部長摩古津掃哩圖背金約金

主遣丞相完顏襄帥兵逐之北走帝聞之發近兵自鄂

諾河迎擊

按金史完顏襄傳未載此事惟續通鑑綱目載金以滅塔塔爾功封元祖為綽爾圖噶

殺摩古津掃哩圖盡虜其輜重克呼部扎寔甘布來歸

扎寔甘布者部長王汗之弟也王汗名托里受金封爵

為王番言音重故稱王為王汗初托里之父呼爾察和

斯必瑠既卒托里嗣位多殺戮昆弟其叔父珠爾帥兵

與托里戰托里大敗以百餘騎脫走奔於烈祖烈祖親

為帥兵逐珠爾走西夏復奪部衆歸托里托里德之遂相與盟稱為諧達烈祖崩托里之弟額爾克哈喇怨托里多殺之故復叛歸奈曼部奈曼部長伊納克齊為發兵伐托里盡奪其部衆與之托里走河西回鶻回回三國奔契丹既而復叛歸中道糧絕帝以其與烈祖交好遣近侍往招之親迎撫勞安置軍中振給之為伐默爾奇斯部取其貲財田禾以遺托里托里因此部衆稍集居亡何托里自率兵復攻默爾奇斯部大掠而還於帝一

無所遺會奈曼部長博囉汗不服帝復與托里征之至克實克巴克實之野會日暮各按營壘約明日赴敵托里乘夜多燃火營中示人不疑潛移部衆於別所及旦帝始知之因頗疑其有異志退師薩里河既而托里亦還至圖喇河托里子伊勒哈及札寔甘布來會奈曼將齊蘇等察知之乘其不備襲虜其部衆於道伊勒哈奔告托里托里命伊勒哈與布爾古特共追之且遣使來曰奈曼不道掠我人民太子有四良將能假我以雪恥

乎帝遂遣博爾濟穆呼哩博囉罕齊拉袞四人帥師以
往師未至伊勒哈已追及齊蘇與之戰大敗布爾古特
被擒伊勒哈馬中流矢幾為所獲須臾四將至擊奈曼

走盡奪所掠歸托里已而與皇弟

按皇弟元史作皇帝
考元世系哈札爾雖

非烈祖之後然元祖嘗美諸昆弟云哈札爾之射取天
下足矣據此則為兄弟行無疑而帝弟音同遂至沿悞
於名義亦未合謹改哈扎爾再伐奈曼與戰於和倫扎色山大敗

之盡殺其諸將族衆積尸以為京觀奈曼之勢遂弱帝
欲為長子卓沁求婚於托里女超爾必濟托里之子托

斯和亦欲尚帝女浩沁必濟俱不諧自是頗有違言初
帝與托里合軍攻奈曼也扎木哈克起兵援奈曼未及
而奈曼敗乃欲帝與托里有隙言於托里曰我於君是
白翎雀他人鴻鴈耳白翎雀者寒暑常在北方鴻鴈遇
寒則南飛就暖意謂帝心不可保也托里聞之疑遂移
部衆於別所及議婚不成扎木哈克復乘隙謂伊勒哈
曰太子嘗通信於奈曼將不利於君父子君若能加兵
我當從傍助君也伊勒哈信之遣使言於托里托里不

聽伊勒哈力言之使者往還數四托里曰吾身之存實

太子是賴汝善自為之母貽吾憂可也扎木哈克遂縱

火焚帝牧地而去歲癸亥

按癸亥元史作癸丑改是年為金章宗泰和三年越二年

而元太祖稱帝是為丙寅况此下有歲甲子歲乙丑與元年丙寅相接此為癸亥之悞無疑謹改 托里

父子謀欲害帝乃遣使者來曰向者所議媯事今當相

從請來飲布琿察爾布琿察爾猶言許親酒也帝以為

然率十騎赴之至中道心動命一騎往謝帝遂還托里

謀既不成即議舉兵來侵圍人齊哩克齊聞其事密與

弟巴達告帝帝即馳軍阿蘭塞悉移鞬重於他所

親征
記作

移鞬重於
錫勒津河

遣哲哩默為前鋒與托里兵遇敗之伊勒哈

將勁騎直前衝突射之中頰即斂兵而退奇味部人遂
棄托里來降托里既敗而歸帝亦將兵還至棟格澤駐
軍遣阿里哈往責托里曰君為叔父珠爾所逐困迫來
歸我父即攻珠爾敗之於河西其土地人民盡收於君
此大有功於君一也君為奈曼所攻西奔日沒處君弟
扎寔甘布在金境我亟遣人召還比至又為默爾奇斯

部人所逼我請我兄色辰伯奇及我弟色辰岱酬往殺
之此大有功於君二也君困迫來歸時我過哈達拉歷
取諸部羊馬貨財盡以奉君不半月間饑者飽瘠者肥
此大有功於君三也君不告我往掠默爾奇斯部大獲
而還未嘗以毫髮分我及君為奈曼所傾覆我遣四將
奪還爾民人重立爾國家此大有功於君四也我征都
爾本塔塔爾哈塔錦薩勒珠特鴻吉哩五部如海東鷲
禽之於鵝鴈見無不獲獲則必致於君此大有功於君

五也今乃易恩為讐而遽加兵於我哉遂進兵至班珠爾河河水方渾帝飲之以誓衆凡與飲河水者謂之飲渾水言其曾同艱難也時托里形勢盛強衆頗危懼帝與戰於哈喇克沁沙圖之地托里敗走路逢奈曼部將遂為其所殺伊勒哈走至龜茲國龜茲國主亦以兵討殺之帝既滅托里大獵於特默格川宣布號令振凱而歸時奈曼部長迪延汗心忌帝能遣使謀於巴達勒達部主阿嚕哈斯曰吾聞東方有稱帝者天無二日民豈

有二王耶君能益吾右翼吾將奪其弧矢也阿嚕哈斯
即以是謀報帝舉部來歸歲甲子帝大會於特默格川

議伐奈曼羣臣以方春馬瘦宜俟秋高為言皇弟

按皇弟元

史作皇帝考世系表鄂齊錦為烈祖第四子太祖弟也
當時國俗有大皇帝二皇帝之稱或修史者遂沿其悞
耳然名義未
合謹據表改鄂齊錦曰事所當為斷之在早何可以馬

瘦為辭帝悅遂進兵伐之駐兵於沁達罕山先遣呼必
哩哲伯二人為前鋒迪延汗至自阿勒台營於杭愛山
與默爾奇斯部長托克托克呼部長阿林台寔衛喇特

部長呼圖克伯奇暨都爾本塔塔爾哈塔錦薩勒珠特
諸部合兵勢頗盛時營中馬有軼入奈曼營者迪延汗
見之與衆謀曰蒙古之馬瘦弱如此今當誘其深入然
後戰而擒之其將呼魯蘇伯奇對曰先王戰伐勇進不
回馬尾人背不使敵人見之今為此遷延之計得非怯
乎迪延汗怒即躍馬索戰帝以哈扎爾主中軍時扎木
哈克從迪延汗來見帝軍容整肅遁去帝與奈曼軍大
戰至晡禽殺迪延汗諸部軍一時皆潰餘衆悉降先是

蒙古居烏桓之北與奈曼回鶻接壤世修貢於遼金號
微弱至是滅克呼降奈曼兼收都爾本塔塔爾哈塔錦
薩勒珠特四部駸駸乎稱雄矣歲乙丑帝征西夏拔拉
吉哩寨經羅索城而還

元年丙寅帝大會諸王羣臣建九旂白旗即皇帝位於
鄂諾河之源諸王羣臣共上尊號曰青吉斯皇帝是歲
實宋寧宗開禧二年金章宗泰和六年也帝既即位遂
發兵復征奈曼時博囉汗獵於烏爾圖山禽之以歸迪

延汗子庫楚類汗與托克托奔鴉爾達實河上帝始議
伐金初金殺帝宗親罕布海汗帝思欲報之會金降俘
等具言金主璟肆行暴虐乃定議致討

二年丁卯秋再征西夏尅衛喇喀城是歲遣阿勒坦保
喇二人使竒爾濟蘇既而伊德爾訥呼部阿勒達爾部
皆通使來獻名鷹

三年戊辰春帝至自西夏夏避暑龍庭冬再征托克托
及庫楚類汗時衛喇特部等遇我前鋒不戰而降因用

為向導至雅爾達實河討默爾奇斯部滅之托克托中
流矢死庫楚類汗奔契丹

四年己巳春輝和爾國來歸

按親征記云國主伊都呼
遣官來議和時默爾奇斯

托克托子呼圖克齊拉裏瑪刺勒圖沙干四人取托克
托首奔輝和爾伊都呼拒之與戰於斡河遣使來告尋
貢珍寶 帝入河西夏主李安全遣其世子率師來戰敗
方物

之獲其副元帥高令公尅烏梁海城俘其太傅西壁氏
進至克夷門復敗夏師獲其將威明令公薄中興府引
河水灌之堤決水外潰遂撤圍還遣太傅額特入中興

府招諭夏主夏主納女請和

五年庚午春金謀來伐築烏沙堡帝命哲伯襲殺其衆
遂畧地而東初帝貢歲幣於金金主使衛王允濟受之
於靜州帝見允濟不為禮允濟歸欲請兵攻之會金主

璟殂允濟嗣位

按太祖即位在金章宗泰和六年衛王嗣位當在太祖四年此叙於五年蓋追

也述有詔至國傳言當拜受帝問金使曰新君為誰金使

曰衛王也帝遽南面唾曰我謂中原皇帝是天上人做
此等庸懦亦為之耶何以拜為即乘馬北去允濟聞之

益怒欲俟帝再入貢就進場害之帝知之遂與金絕益
嚴兵為備

六年辛未春帝居吉魯爾河西域哈刺婁部主阿爾斯

蘭汗來降二月帝自將南伐

按太祖起兵伐金衛紹王
紀載在大安三年四月此

作二月彼
此互異

敗金將達實於野狐嶺取大水灤豐利等縣

金復築烏沙堡秋七月命哲伯攻烏沙堡及烏月營拔
之八月帝及金師戰於宣平之會河川敗之閏九月

按元

史無閏字據續
通鑑綱目增

拔德興府居庸關守將遁去哲伯遂入

闕抵中都冬十月襲金羣牧監驅其馬而還以皇子卓
沁察罕台烏格台分徇雲內東勝武朔等州下之是冬
駐蹕金之北境劉伯林瓜爾佳常格等來降

七年壬申春正月故遼人耶律瑠格聚衆於隆安自為
都元帥遣使來附帝破昌桓撫等州金將赫舍哩糾堅
等率兵三十萬來援帝與戰於權兒背大敗之

按權兒背之戰

金史衛紹王紀未載績通鑑綱目載在嘉定四年閏九月蓋太祖之六年也

秋圍西京金元

帥左都監鄂屯襄率師來援帝遣兵誘至密谷口逆擊

之盡殫復攻西京不克九月察罕克奉聖州冬十二月
甲申哲伯克東京

八年癸酉春耶律瑠格自立為遼王改元元統秋七月
帝克宣德府遂攻德興府拔之進至懷來與金行省完
顏綱元帥高琪戰敗之追至北口金兵保居庸詔克特
卜齊守之遂趨涿鹿金西京留守呼沙呼遁去帝出紫
荆關敗金師於五回嶺拔涿易二州契丹烏蘭巴爾等
獻北口哲伯遂取居庸與克特卜齊會八月金呼沙呼

弒其主允濟迎豐王珣立之是秋分兵三道命皇子卓
沁察罕台烏格台為右軍循太行而南取保遂安肅安
定邢洺磁相衛輝懷孟掠澤潞遼沁平陽太原吉陽拔
汾石嵐忻代武等州而還皇弟哈扎爾及旺沁諾延卓
齊特博恰為左軍遵海而東取薊州平灤遼西諸郡而
還帝與皇子圖類為中軍取雄霸莫安河間滄景獻深
祁蠡冀恩濮開滑博濟泰安濟南濱棣益都緇維登萊
沂等郡復命穆呼哩攻密州屠之史天倪蕭伯特率衆

來降穆呼哩承制並以為萬戶帝至中都三道兵俱會
是歲河北郡縣盡拔惟中都通順真定清沃大名東平
德邳海州十一城不下

九年甲戌春三月駐蹕中都北郊諸將請乘勝破燕帝
不從乃遣使諭金主曰汝山東河北郡縣悉為我有汝
所守惟燕京耳天既弱汝我復迫汝於險天其謂我何
我今還軍汝不能犒師以弭我諸將之怒耶金主遂遣
使求和奉衛紹王女岐國公主及金帛童男女五百馬

三千以獻仍遣其丞相完顏福興送帝出居庸夏五月
金主遷汴以完顏福興及參政穆延盡忠輔其太子守
忠留守中都六月金紇軍卓多等殺其主帥率衆來降
帝怒金主南遷遂詔薩木哈舒穆魯明安與卓多等圍
中都帝避暑魚兒濼秋七月金太子守忠奔於汴冬十
月穆呼哩征遼東高州盧琮金朮等降錦州張鯨殺其
節度使自立為臨海王遣使來降

十年乙亥春正月金右副元帥富察齊錦以通州降二

月穆呼哩攻北京金元帥音達琿以城降以為留守烏

葉爾權兵馬都元帥鎮之興中府元帥石天應來降

音按

達琿石天應來降續通鑑綱目俱作上年事

以為興中府尹三月金御史中

丞李英等率師援中都戰於霸州敗之夏四月克清順

二州詔張鯨總北京十提控兵從南征鯨謀叛伏誅鯨

弟致遂據錦州僭號漢興皇帝改元興龍五月庚申金

中都留守完顏福興仰藥死穆延盡忠棄城走明安入

守之是月帝避暑桓州涼涇遣呼圖克等籍中都帑藏

秋七月紅羅山寨主杜秀降以為錦州節度使遣伊奇
哩往諭金主以河北山東未下諸城來獻及去帝號為
河南王當為罷兵金主不從詔史天倪南征授右副都
元帥賜金虎符八月天倪取平州金經畧使竒珠降穆
呼哩遣史進道等攻廣寧府降之是秋取城邑凡八百
六十有二冬十月金宣撫布希萬努據遼東僭稱天王
國號大真改元天泰十一月耶律瑠格來朝以其子錫
沙入侍史天祥克興州擒其節度使趙守玉

十一年丙子春帝還臚胸河

按臚胸河在楊林戍西北今名克嚕倫河源出克特

山南明成祖北征駐師於此改名飲馬見明一統志及明史元史作臚胸誤謹據

改行宮張致陷

興中府穆呼哩討平之秋錫里濟額特薩木哈巴圖爾率師由西夏趨關中遂越潼關獲金西安軍節度使尼瑪哈富勒呼拔汝州等郡抵汴京而還冬十月布希萬努降以其子特格入侍既而復叛僭稱東夏

十二年丁丑夏盜祁和尚據武平史天祥討平之遂擒金將巢元帥以獻察罕破金監軍等兵於霸州金使求

和察罕乃還秋八月以穆呼哩為太師封國王將蒙古
紉漢諸軍南征拔遂城蠡州冬克大名府遂東定益都
淄登萊濰密等州是歲圖們部民叛命布琳都爾伯討
平之

十三年戊寅秋八月兵出紫荆口獲金行元帥事張柔
命還其舊職穆呼哩自西京入河東克太原平陽及忻
代澤潞汾霍等州金將武仙攻滿城張柔擊敗之是年
伐西夏圍其王城夏主李遵頊出走西涼契丹祿格據

高麗江東城命浩沁扎拉率師平之高麗王暎遂降請
歲貢方物

十四年己卯春張柔敗武仙降祁陽曲陽中山等城夏
六月帝率師征西域取鄂托喇爾城擒其酋哈濟爾濟
蘭圖秋穆呼哩克尙嵐吉隰等州進攻絳州拔之

十五年庚辰春三月帝克布哈城夏五月克塔什干城
駐蹕葉實勒提斯河秋攻鄂托羅爾城克之穆呼哩徇
地至真定武仙出降以史天倪為河北西路兵馬都元

帥行府事仙副之東平嚴實以彰德大名磁洺恩博滑
瀋等州來歸穆呼哩承制授實金紫光祿大夫行尚書
省事冬金邢州節度使武貴降穆呼哩攻東平不克留
嚴實守之撤圍趨洺州分兵徇河北諸郡

十六年辛巳春帝攻布哈爾賽瑪爾堪等城皇子卓沁
攻安集延巴爾昌等城並下之夏四月駐蹕鐵門關金
主遣烏克遜仲端奉國書請和稱帝為凡不允金東平
行省事孟古橐城遁嚴實入守之宋遣苟夢玉來請和

六月宋連水忠義統轄石珪率衆來降

按宋史寧宗紀嘉定十三年十

二月連水忠義軍統轄石珪叛宋嘉定十三年庚辰為元太祖十五年此書在十六年六月與宋史異

以

為濟兗單三州總管秋帝攻巴喇哈等城皇子卓沁察

罕台烏格台分攻玉隆哈什等城下之冬十月皇子圖

類克瑪勒齊里克瑪勒齊阿喇斯等城穆呼哩出河西

克葭綏德保安廊坊丹等州進攻延安不克十一月宋

京東安撫使張琳以京東諸郡來降

宋史作張林

以為滄景

瀋棣等州行都元帥

十七年壬午春皇子圖類克圖舍尼綽爾等城還經穆壘國大掠之渡楚楚拉河克伊拉等城遂與帝會合兵攻塔爾哈寨拔之穆呼哩軍克乾涇邠原等州攻鳳翔不克夏帝避暑塔爾哈寨西域主扎拉鼎出奔與瑪里克汗合呼圖克與戰不利帝自將擊之擒瑪里克汗扎拉鼎遁去秋金復遣烏克遜仲端來請和見帝於回鶻國帝謂曰我向欲汝主授我河朔地今汝主為河南王彼此罷兵汝主不從今已盡取之乃始來請耶仲端固

以請帝曰念汝遠來河朔既為我有關西數城未下者其割付我令汝主為河南王勿復違也金平陽公胡天作按金史傳胡天作字景山元史紀誤作天祥今改以青龍堡降冬十月金河中府來附以石天應為兵馬都元帥守之

十八年癸未春三月太師國王穆呼哩薨夏帝避暑帕爾滿川皇子卓沁察罕台烏格台及巴拉之兵來會遂定西域諸城置達嚕噶齊監治之冬十月金主珣殂子守緒立是歲宋復遣苟夢玉來

十九年甲申夏宋大名總管彭義斌侵河北史天倪與戰於恩州敗之是歲帝至東印度國以角端見班師

二十年乙酉春正月帝還行宮二月武仙以真定叛殺史天倪董俊判官李全亦以中山叛三月史天澤擊仙走之復真定夏六月宋彭義斌以兵應仙天澤禦於贊皇擒斬之

二十一年丙戌春正月帝以西夏納仇人寔勒噶克繖昆及不遣質子自將伐之二月取黑水等城夏避暑於

瑋楚山取甘肅等州秋取西涼府朔羅河羅等縣遂踰沙陀至黃河九度取應里等縣九月李全執張琳郡王岱遜進兵圍全於益都冬十一月庚申帝攻靈州夏遣威明令公來援丙寅帝渡河擊夏師敗之丁丑駐蹕鹽州川十二月李全降授張柔行軍千戶保州等處都元帥是歲皇子烏格台及察罕之師圍金南京遣唐慶貴歲幣於金

二十二年丁亥春帝留兵攻夏王城自率師渡河攻積

石州二月破臨洮府三月破洮河西寧二州遣旺沁諾
延攻信都府拔之夏四月帝次龍德拔德順等州五月
遣唐慶等使於金閏月避暑六盤山六月金遣完顏哈
昭鄂屯阿古來請和帝謂羣臣曰朕自去冬已嘗許不
殺掠遽忘下詔耶今可布告中外令彼行人亦知朕意
是月夏主李覲降執之以歸遂滅夏帝次清水縣西江
秋七月壬午不豫己丑崩於薩里川哈喇圖之行宮臨
崩謂左右曰金精兵在潼關南據連山北限大河難以

遽破若假道於宋宋金世讐必能許我則下兵唐鄧直
擣大梁金急必徵兵潼關然以數萬之衆千里赴援人
馬疲弊雖至弗能戰破之必矣言訖而崩後卒如帝言
年六十六葬起輦谷追謚曰聖武皇帝加謚法天啟運
聖武皇帝廟號太祖在位二十二年帝深沈有大畧善
用兵故能滅國四十遂平西夏其竒勲偉跡甚衆惜乎
當時史官不備多失於紀載云

戊子皇子圖類監國

太宗皇帝諱烏格台太祖第三子也母光獻皇后鴻吉哩氏太祖伐金定西域帝攻城掠地之功居多太祖崩自和博之地來會喪

元年己丑夏至固爾班蘇巴克之地監國圖類來見秋八月己未諸王羣臣大會於吉魯爾河齊達勒敖拉之地以太祖遺詔即皇帝位於奎騰阿喇勒始立朝儀皇族尊屬皆拜頒大扎薩克金遣阿固岱來歸太祖之賵帝曰汝主久不降使先帝老於兵間吾豈能忘也賵何

為哉却之遂議伐金印度國主木羅夷國主來朝西域
伊斯巴爾城酋長來降金復遣使來聘不受

二年庚寅春正月詔自今以前事勿問是春帝與圖類
獵於諤爾根河遂遣兵圍京兆金人來援敗之尋拔其
城夏避暑於塔密爾河多果朗及金兵戰敗績命蘇布
特援之秋七月帝自將南伐圖類及其子莽賚扣率師
以從拔天成等堡遂渡河攻鳳翔冬十一月攻潼關藍
關不克十二月拔天勝寨及韓城蒲城

三年辛卯春二月克鳳翔

按元兵克鳳翔金史哀宗紀載在四月續通鑑綱目同此

作二月互異

攻洛陽河中諸城克之夏五月帝避暑於九十

九泉命圖類出師寶雞遣綽布干如宋假道宋人殺之

秋八月如雲中始立中書省以耶律楚材為中書令鈕

祜祿珠順為左丞相鎮海為右丞相是月以高麗殺使

者命薩里台率師討之取四十餘城高麗王瞰遣使請

降薩里台承制設官分鎮其地乃還冬十月乙酉帝圍

河中十二月己未拔之

按元兵拔河中續通鑑綱目載在九月此作十二月金史哀宗

紀興
此同

四年壬辰春正月戊子帝由河清縣渡河庚寅圖類渡
漢江遣使來報即詔諸軍進發甲午次鄭州金防城堤
控馬伯堅降即使守之丁酉次新鄭是日圖類及金師
戰於鈞州之三峯大敗之戊戌帝至三峯壬寅攻鈞州
克之遂下商虢嵩汝陝洛許鄭陳亳潁壽睢永等州三
月命蘇布特等圍南京金主遣其弟曹王額爾克入質
帝還留蘇布特守河南夏四月帝出居庸避暑官山高

麗叛殺所置官吏徙居江華島秋七月遣唐慶至金諭
降金殺之和議遂絕八月薩里台復征高麗中矢卒金
叅政完顔色埒恒山公武仙以兵援南京諸軍與戰敗
之九月圖類薨帝還龍庭冬十一月獵於納喇齊拉衮
之野十二月如太祖行宮

五年癸巳春正月庚申金主奔歸德戊辰金西面元帥
崔立殺留守完顔納紳完顔薩尼雅布以南京降二月
如托里圖夏四月蘇布特進至青城崔立以金太后王

氏后圖克坦氏及梁王從恪荆王守純等

考金史傳從恪係衛紹王

子崔立為亂太后立為梁王守純係宣宗子正大元年進封荆王元史誤作荆王從恪梁王從純今據改

軍中蘇布特遣送行在遂入南京六月金主奔蔡塔齊

爾率師圍之詔以孔子五十一世孫元措

元史作元楷續通鑑綱目

及耶律楚材傳皆作元措謹據改

襲封衍聖公秋八月獵於額伯蘇地

以阿克棟阿等充宣差勘事官括中州戶得戶七十三

萬餘冬十一月宋遣荆鄂都統孟珙以兵糧來助十二

月諸軍與宋兵合攻蔡敗武仙於息州海沂萊維等州

降是冬帝至阿嚕烏格衮行宮敕修孔子廟及渾天儀
六年甲午春正月金主傳位於宗室子承麟遂自經城
破獲承麟殺之與宋分定金地界而歸金亡是春會諸
王宴射於諤爾根河夏五月帝在達蘭達巴之地大會
諸王百僚頒諭條令秋七月以呼圖克諾延為中州斷
事官遣達海甘布征蜀是秋帝在巴爾斯達蘭達巴之
地議自將伐宋國王札拉圖請行遂遣之冬獵於托卜
輝罕地

七年乙未春城和琳作萬安宮遣諸王巴圖及子庫裕克姪莽賚扣征西域子庫騰征秦鞏子庫春及呼圖克伐宋唐古征高麗秋九月諸王昆布哈獲宋何太尉冬

十月庫春圍宋棗陽拔之遂徇襄鄧入郢十一月庫騰

攻石門金便宜都總帥汪世顯降

按汪世顯降元續通鑑綱目載於十月與

此中書省臣請契勘大明歷從之

八年丙申春二月命應州郭勝鈞州富珠哩玖珠鄧州趙祥從庫春充先鋒伐宋三月復修孔子廟及司天臺

夏六月復括中州戶口得續戶一百一十餘萬耶律楚材請立編修所於燕京經籍所於平陽編集經史召儒士梁陟充長官以王萬慶趙著副之秋七月命陳時可閱刑名科差課稅等案赴闕磨照詔以真定民戶奉太后湯沐中原諸州民戶分賜諸王貴戚尋改命設達魯噶齊朝廷置官吏收其租頒之非奉詔不得徵兵賦庫騰率汪世顯等入蜀取宋關外數州冬十月庫騰入成都秦鞏等二十餘州皆降張柔等攻郢州拔之襄陽府

來附以游顯領襄陽樊城事

九年丁酉春帝獵於齊齊克察罕之澤莽賚扣征欽察部破之擒其酋巴齊瑪克夏四月築縹琳城作格根察罕殿秋八月命摩和納劉中試諸路儒士中選者除本貫議事官冬十月獵於野馬川如龍庭遂至行宮是冬昆布哈等克光州遂別攻蘄州降隨州畧地至黃州宋懼請和乃還

十年戊戌春塔斯軍至北峽關宋將汪統制降夏襄陽

別將劉義叛執游顯等降於宋宋兵復取襄樊帝獵於齊齊克察罕之澤築托斯和城作迎駕殿秋八月以諸路旱蝗詔免今年田租仍停舊未輸納者俟豐歲議之十一年己亥春帝復獵於齊齊克察罕之澤秋七月游顯自宋逃歸以山東諸路災免其稅糧冬十一月莽賚扣圍烏蘇木奇城閱三月拔之

十二年庚子春正月皇子庫裕克克西域未下諸部遣使奏捷命張柔等八萬戶伐宋冬十二月詔庫裕克班

師籍諸王大臣所俘男女為民

十三年辛丑春二月帝獵於齊齊克察罕之澤不豫詔赦囚徒秋高麗國王王暉以族子縉入質冬十月以伊囉斡齊主管漢民公事十一月丁亥大獵庚寅還至烏特古呼蘭山辛卯帝崩於行殿在位十三年年五十六葬起輦谷追謚曰英文皇帝廟號太宗

壬寅春六皇后尼瑪察氏稱制秋七月張柔自五河口渡淮攻宋揚滁和等州

癸卯春正月張柔分兵屯田於襄城秋后命張柔總兵
戍杞

甲辰夏五月中書令耶律楚材薨

乙巳秋后命馬步軍都元帥察罕等率騎三萬與張柔
掠淮西攻壽州拔之遂攻泗州盱眙及揚州宋制置趙

葵請和乃還

按壬寅至是歲
俱六皇后稱制

定宗皇帝諱庫裕克太宗長子也母六皇后尼瑪察氏
太宗嘗命諸王阿齊台伐金帝以皇子從虜其親王而

歸又從諸王巴圖西征次阿克蘇境攻圍木柵山寨以三十餘人與戰帝及憲宗與焉太宗嘗有旨以皇孫寶勒們為嗣太宗崩皇后臨朝者幾五年乃召諸王百官於達蘭達巴之地議立帝久不決諸王將謀亂會雷雨大作行帳水深數尺遂各散去

元年丙子春正月張柔入覲於和琳秋七月帝即位於昂吉蘇默托里之地六皇后仍稱制冬權萬戶史權等耀兵淮南攻虎頭關寨拔之進圍黃州

二年丁未春張柔攻泗州夏帝避暑於竒喇圭哈喇哈
斯之地秋西巡八月命伊勒吉濟達率綽斯滿部兵西
征是月詔蒙古人戶每百以一名充巴圖爾九月取太
宗宿衛之半以伊克們都爾領之冬十月括人戶

三年戊申春三月帝崩於杭錫雅爾之地在位三年年
四十三葬起輦谷追諡曰簡平皇帝廟號定宗夏四月
皇后烏拉海額實氏抱太孫實勒們臨朝稱制是歲大
旱河水盡涸野草自焚牛馬十死八九人不聊生諸王

及各部又遣使於燕京迤南諸郡徵求貨財弓矢鞍轡之物或於西域回鶻索取珠璣或於海東取鷹鷂驛騎絡繹晝夜不絕民力益困自壬寅以來法度不一內外離心太宗之政衰矣

己酉皇后稱制之元年

庚戌皇后稱制之二年自定宗崩後議所立未決當是時已三歲無君其行事之詳簡策失書無從考也

憲宗皇帝諱恭睿睿宗圖類之長子也母莊獻皇后

奇味氏太宗在潛邸養以為子及睿宗薨乃命歸藩邸
屢從征伐嘗攻欽察部其酋巴齊瑪克逃於海島帝聞
亟進師至其地適大風刮海水去其淺可渡帝曰此天
開道於我也遂進屠其衆擒巴齊瑪克甫班師而水已
至後軍有浮渡者復與諸王巴圖征俄羅斯部至額里
齊城躬自搏戰破之歲戊申定宗崩朝廷久未立君中
外恟恟咸屬意於帝諸王巴圖穆格額呼布格綏克托
台奇爾及大將烏蘭哈達等咸會於阿爾圖和賚之地

巴圖首建議推戴時定宗皇后烏拉海額實所遣使者
巴拉在坐曰昔太宗命以皇孫實勒們為嗣諸王百官
皆與聞之今實勒們故在而議欲他屬將寘之何地耶
穆格曰太宗有命誰敢違之然前議立定宗由皇后托
里格呼勒與汝輩為之是則違太宗之命者汝等也今
尚何言耶巴拉語塞烏蘭哈達曰莽賚扣聰明睿知人
咸知之巴圖之議良是巴圖乃申令於衆衆悉應之議
遂定

元年辛亥夏六月帝即位於鄂諾河改更庶政以弟呼
必賚領治蒙古漢地民戶遣塔爾鄂勒博察球爾賽音
諤德齊趙璧等詣燕京撫諭軍民以蒙克薩勒為斷事
官以博勒和掌宣發號令朝覲貢獻及內外聞奏諸事
以鴻和爾留守和琳宮闕帑藏阿勒達爾副之以伊羅
幹齊布札爾鄂勒博都特達喇等充燕京等處行尚書
省事賽音諤德齊鼐智密鼎佐之以諾海塔喇海巴蘇
呼等充巴實伯里等處行尚書省事溫都爾烏遜阿哈

瑪特伊德實佐之以諤爾根充阿穆河等處行尚書省
事帕哈哩鼎伊斯瑪音佐之以察罕伊爾根統兩淮等
處蒙古漢軍以丹達爾統四川等處蒙古漢軍以和爾
台統土番等處蒙古漢軍皆仍前征進約蘇圖阿齊台
昌吉卓諾哈達竒凌阿勒楚爾及綱阿塔阿薩爾和塔
拉等坐誘諸王為亂並伏誅罷築和琳城役千五百人
冬以揚珠濟達違命遣哈坦誅之仍籍其家

二年壬子春正月如實珪之地遣竒塔特布哈攻莽賚

伊勒都齊寨皇太后崩夏駐蹕和琳分遷諸王於各所
仍以太宗諸后妃家貲分賜親王定宗后及實勒們母
以厭禳事覺並賜死謫實勒們伊蘇布琳等於摩多齊
之地禁錮呼齊納和斯圖等於軍營秋七月命呼必賚
征大理諸王托羅海薩奇勒征身毒奇爾台布哈征瑪
拉希實喇征西域蘇勒坦諸國詔諭宋荆南襄陽樊城
均州諸守將使來附冬十月命諸王伊克征高麗帝駐
蹕烏特古呼蘭之地十二月戊午大赦以特爾格齊庫

庫楚等掌帑藏布琳哈喇烏遜掌譯都阿固察掌祭祀
醫巫卜筮阿拉克布哈副之諸王哈喇薨以珠爾噶岱
掌傳驛所需博勒和掌筆且齊寫發宣詔及諸色目官
職是歲籍漢地民戶諸王實喇薨

三年癸丑春正月帝會諸王於鄂諾河北罷征高麗兵
以扎拉台為征東元帥遣必齊克伯爾克括俄羅斯戶
口三月攻海州戍將王國昌逆戰於城下敗之夏六月
命諸王錫里庫及烏蘭哈達等帥師征西域法勒哈巴

哈台等國又命多托爾台薩里圖爾哈等征痕都斯坦
寶克密爾等國帝如和哩呼納顏布哈之地秋至準淖
爾以蒙克薩勒為萬戶哈坦為扎爾古齊九月呼必賚
次塔拉地分兵三道以進冬十二月大理平帝駐蹕昂
吉地命宗王雅勒呼與洪福源同領軍征高麗攻拔禾
山東州春州三角山楊根天龍等城

四年甲寅春帝獵於齊齊克察罕夏如伊爾默色之地
遣扎拉爾部人和爾齊征高麗秋七月詔官吏之赴朝

理算錢糧者許自首不公仍禁以後浮費冬大獵於額
默克沁哈爾察海之地呼必賚還自大理留烏蘭哈達
攻諸夷之未附者是歲會諸王於庫庫淖爾之西乃祭
天於日月山初籍新軍帝諭大臣求可以慎固封守閑
於將畧者擢史樞征行萬戶配以真定相衛懷孟諸軍
駐唐鄧張柔移鎮亳州權萬戶史權屯鄧州以逼宋張
柔遣張信將八漢軍戍潁州王安國將四千戶渡漢南
深入而還張柔以連歲勤兵兩淮艱於糧運奏據亳之

利詔柔率山前八軍城而戍之均州總管孫嗣遣人齎蠟書降驍將鍾顯王梅杜柔袁師信各帥所部來降五年乙卯春詔徵逋欠錢穀夏帝如伊爾默色土秋九月張柔會大帥於符離築百丈口甬路及橫江堡是歲改命扎拉台與洪福源同征高麗

六年丙辰春帝會諸王百官於烏爾伯克圖之地設宴六十餘日賜金帛有差仍定擬諸王歲賜錢穀呼必賚遣默爾合齊詣行在所奏請續簽內郡漢軍從之夏四

月駐蹕於塔密爾五月如實喇鄂爾多六月如岱爾哈
達會議伐宋秋七月諸王塔齊爾駙馬特爾格軍過永
平諸處掠民羊豕帝聞遣使問罪由是諸軍無犯者是
歲高麗國王細嗟甫雲南酋長摩合羅嗟及蘇勒坦諸
國來覲烏蘭哈達討白蠻等克之

按續通鑑綱目載烏
蘭哈達討克白蠻等

國事在寶祐三年蓋憲宗
五年也此載在六年互異

遂自實巴爾地還至重慶府

敗宋將張都統賜金縷織文衣一襲銀五十兩綵帛萬
二百匹以賚軍士冬帝駐蹕阿都齊塔齊爾愛滿以阿

珠河回回降民分賜諸王百官

七年丁巳春如呼蘭伊勒吉詔諸王出師征宋竒塔特
布哈等討莽賚伊勒都齊寨平之夏六月謁太祖行宮
祭旗鼓復會於吉魯爾之地還至伊爾默色土秋駐蹕
於準淖爾醜馬乳祭天九月出師南征以駙馬琳沁之
子竒塔特為達嚕噶齊鎮守俄羅斯仍賜馬三百羊五
千回鶻獻水精盆珍珠傘等物却之且禁後勿復獻宗
王塔齊爾率諸軍南征圍樊城霖雨連月乃班師元帥

布琳濟達軍自鄧州畧地遂渡漢江冬十一月烏蘭哈達伐交趾敗之入其國安南主陳日熒竄海島遣阿勒達爾托音曩嘉特等詣陝西等處理算錢穀是冬帝渡漠南至於玉隆棧呼必賚及諸王額呼布格巴爾圖楚木哈喇玉隆哈什錫里濟公主塔瑪噶等來迎大燕既而各遣歸所部

八年戊午春正月朔如阿爾班托哈之地受朝賀二月陳日熒傳國於長子光曷光曷遣壻與其國人以方物

來見烏蘭哈達送詣行在所諸王錫里庫討回回法勤

哈平之禽其王遣使來獻捷帝獵於伊埒哈雅之地師

南征次於河適冰合以土覆之而渡帝自將伐宋

按憲宗自

將伐宋事續通鑑綱目及宋元通鑑俱作七年八月由西蜀以入命張柔從呼必

賚征鄂趨杭州命塔齊爾攻荆山分宋兵力宋四川制

置使蒲澤之攻成都耨埒率師擊敗之進攻雲頂山詔

以耨埒為都元帥帝由東勝河渡遣參知政事劉太平

括興元戶口三月命洪俊奇率師從扎拉台同征高麗

夏四月駐蹕六盤山豐州千戶郭燧奏請續簽軍千人
修治金州從之是時軍四萬號十萬分三道而進帝由
隴州入散關諸王默格由祥州入米倉關布爾察克萬
戶由漁關入沔州以明安岱爾為太傅守京兆詔徵益
都行省李壇兵壇上言益都南北要衝兵不可撤從之
壇還擊海州漣水等處五月皇子阿實達因獵馳騎傷
民稼帝責讓之仍撻近侍數人

皇子阿實達因獵傷稼
事宋元通鑑作八年四

月士卒有拔民蔥者即斬以徇由是秋毫無敢犯仍賜

所經郡守各有差秋七月率兵由寶雞攻重貴山所至
輒平八月辛丑瓊與宋人戰殺宋師殆盡九月駐蹕漢
中都元帥耨埒留密喇卜和卓劉哈瑪爾等守成都悉
率餘兵渡馬湖禽宋制置使張寶遂遣寶招諭苦竹隘
寶適冬十月壬午帝次寶峯癸未如利州以汪特格能
守蜀賜卮酒獎諭之帝渡嘉陵江至白水江命特格造
浮梁以濟梁成賜特格等金帛有差帝駐蹕劔門戊子
攻苦竹隘裨將趙仲竊獻東南門師入與其守將楊立

戰敗之殺立徙趙仲於隆慶己亥獲張寶支解之賜特
格玉帶留精兵五百守之遣使招諭龍州帝至高峯庚
子圍長寧山守將王佐裨將徐昕等率兵出戰敗之十
一月己酉帝督軍先攻鵝頂堡壬子知縣王仲出降是
夜破其城王佐死焉癸丑誅佐之子及徐昕等四十餘
人以彭天祥為達嚕噶齊治其事王仲副之丙辰進攻
大獲山守將楊大淵降以為四川侍郎仍命率其兵以
從庚午次和溪口遣驍騎畧青居山是月龍州降諸王

孟格圖攻禮義山不克諸塔齊爾畧地至江而還並會
於行在所命呼必賚統諸路蒙古漢軍伐宋十二月壬
午楊大淵率所部兵與汪特格分擊相如等縣都元帥
耨埒攻簡州以宋降將張威率衆為先鋒乙酉帝次於
運山大淵遣人招降其守將張大悅仍以大悅為元帥
師至青居山裨將劉淵等殺都統段元鑒降庚寅遣使
招諭未附丁酉隆州降己亥大良山守將蒲元圭降詔
諸軍毋俘掠癸卯攻雅州拔之石泉守將趙順降是歲

皇子瓚都薨於吉河之南

九年己未春正月乙巳朔駐蹕重貴山北置酒大會問諸王駙馬百官曰今在宋境夏暑且至汝等其謂可居否乎扎拉爾部人托歡曰南土瘴癘帝宜北還所獲人民委吏治之便阿爾拉部人巴哩齊曰托歡怯臣願往居焉帝善之戊申諸王孟格圖復攻渠州禮義山伊爾圖魯雄攻巴州平梁山丁卯大淵攻合州俘男女八萬餘人二月丙子帝悉率諸兵渡雞爪灘至石子山丁丑

督諸軍戰城下辛巳攻一字城癸未攻鎮西門三月攻

東新門奇勝門鎮西門小堡夏四月乙未攻護國門丁

酉夜登外城殺宋兵甚衆六月丁巳

按以本年正月乙巳朔推算六月不

應有丁巳日但無汪特格復選兵夜登外城馬軍寨殺

寨主及守城者王堅悉力拒之遲明遇雨梯折後軍不

克進而止是月帝不豫秋七月辛亥留精兵三千守之

餘兵悉攻重慶癸亥帝崩於釣魚山年五十二在位九

年追謚曰桓肅皇帝廟號憲宗

欽定續通志卷五十七